

Na osnovu čl. 24. i 62. Zakona o državnoj službi u institucijama Bosne i Hercegovine („Službeni glasnik BiH“, br. 19/02, 35/03, 4/04, 17/04, 26/04, 37/04, 48/05, 2/06 i 32/07), Agencija za državnu službu, donosi

**U P U T S T V O**  
**o kodeksu ponašanja članova komisija za izbor**  
**državnih službenika u institucijama Bosne i Hercegovine**

Član 1.

Ovim uputstvom ustanovljava se kodeks ponašanja, odnosno propisuju se pravila ponašanja članova komisija za izbor državnih službenika (u daljem tekstu: komisija) u institucijama Bosne i Hercegovine (u daljem tekstu: institucije).

Član 2.

Članovi komisija dužni su se ponašati u skladu sa slijedećim pravilima:

- a) uredno dolaziti na sve sjednice komisija, a u slučaju opravdane nemogućnosti dolaska o tome blagovremeno obavijestiti sekretara komisije;
- b) ponašati se primjereno, korektno i profesionalno, kako prema ostalim članovima komisije, tako i prema sekretaru komisije i kandidatima;
- c) aktivno uzimati učešće u radu komisija, te blagovremeno, profesionalno, nepristrasno i nezavisno obavljati poslove koji proizilaze iz članstva u komisiji.

Član 3.

Članovi komisija ne smiju kršiti pravila ponašanja utvrđena u članu 2. ovog uputstva, posebno na način da:

- a) opstruiraju rad komisija na bilo koji način;
- b) blagovremeno ne opravdaju nedolazak na sjednice komisije;
- c) daju neprimjerene komentare vezano za instituciju, Agenciju, državne službenike i zaposlenike institucije i/ili Agencije;
- d) koriste u verbalnoj komunikaciji povišen ton, psovke, uvrede, klevete, nepristojne izraze, neprimjerene šale i komentare, ili se na drugi način neprimjereno ponašaju prema ostalim članovima komisije, sekretaru ili kandidatima tokom trajanja ispita;
- e) pišu podneske kojima se vrijeđaju običaji pristojnog i uljudnog ponašanja prema instituciji, Agenciji, njihovim državnim službenicima, zaposlenicima i drugim članovima komisije, kao i podneske koji su insinuirajućeg, uvredljivog, klevetničkog ili netačnog sadržaja u vezi sa njihovim članstvom u komisiji;
- f) se ponašaju na način koji predstavlja kršenje radne discipline državnih službenika, prekršaj protiv javnog reda i mira, građanskopravni delikt ili druge oblike ponašanje koje bi moglo ugroziti kredibilitet članova komisije.

#### Član 4.

Člana komisije, koji prekrši jedno ili više pravila ponašanja propisanih članom 2. ovog uputstva, odnosno koji učini neku od povreda pravila ponašanja iz člana 3. ovog uputstva, Agencija razrješava dužnosti, odnosno smjenjuje ga iz komisije.

Uporedo sa donošenjem odluke o smjeni člana komisije, ukoliko je smijenjeni član državni službenik – predstavnik institucije, Agencija će tražiti imenovanje drugog člana, do kada komisija može prekinuti rad, a može se pokrenuti i disciplinski postupak protiv takvog državnog službenika.

#### Član 5.

Lice za koje se naknadno utvrdi da je u svojstvu člana komisije prekršilo jedno ili više pravila ponašanja propisanih članom 2. ovog uputstva, odnosno koje je učinilo neku od povreda pravila ponašanja iz člana 3. ovog uputstva, Agencija više neće imenovati u komisije.

Ukoliko lice iz stava 1. ovog člana bude predloženo za člana komisije od strane institucije, Agencija će odbiti imenovanje takvog lica i od institucije zatražiti da predloži drugog člana komisije.

#### Član 6.

U skladu sa članom 33. stav (2) Odluke o javnom i stručnom ispitu („Službeni glasnik BiH“, broj 96/07), protiv člana komisije koji učini neku od povreda pravila ponašanja iz člana 3. ovog uputstva može se pokrenuti i prekršajni postupak za prekršaj propisan članom 33. stav (1) tačka c) iste Odluke, posebno ako je povreda učinjena na neki od sljedećih načina:

- a) teže narušavanje reda ili činjenje nepristojnosti;
- b) pisanje podnesaka kojima vrijeđa običaje pristojnog i uljudnog ponašanja prema Agenciji, njenim državnim službenicima, zaposlenicima, drugim članovima komisije ili kandidatima.

#### Član 7.

Ova uputstvo stupa na snagu danom donošenja i objaviće se na službenoj internet stranici Agencije za državnu službu, a sa istom će se obavijestiti i svi članovi komisija za izbor.

Broj: 03-02-241/08  
11. marta 2008. godine  
Sarajevo



  
**DIREKTOR**  
**Jakob Finci**